

AENEIDOS XI

audeo et Aeneadam promitto occurrere turmae
 solaque Tyrrhenos equites ire obuia contra.
 me sine prima manu temptare pericula belli, 505
 tu pedes ad muros subsiste et moenia serua.'

Turnus ad haec oculos horrenda in uirgine fixus:
 'o decus Italiae uirgo, quas dicere grates
 quasue referre parem? sed nunc, est omnia quando
 iste animus supra, mecum partire laborem. 510

Aeneas, ut fama fidem missique reportant
 exploratores, equitum leuia improbus arma
 praemisit, quaterent campos; ipse ardua montis
 per deserta iugo superans aduentat ad urbem.

furta paro belli conuexo in tramite siluae, 515
 ut biuias armato obsidam milite fauces.

tu Tyrrhenum equitem conlatis excipe signis;
 tecum acer Messapus erit turmaeque Latinae
 Tiburtique manus, ducis et tu concipe curam.'
 sic ait, et paribus Messapum in proelia dictis 520
 hortatur sociosque duces et pergit in hostem.

Est curuo anfractu ualles, accommoda fraudi
 armorumque dolis, quam densis frondibus atrum
 urget utrimque latus, tenuis quo semita ducit
 angustaeque ferunt fauces aditusque maligni. 525

hanc super in speculis summoque in uertice montis
 planities ignota iacet tutique receptus,
 seu dextra laeuaque uelis occurrere pugnae
 siue instare iugis et grandia uoluere saxa.
 huc iuuenis nota fertur regione uiarum 530
 arripuitque locum et siluis insedit iniquis.

Velocem interea superis in sedibus Opim,
 unam ex uirginibus sociis sacraque caterua,